



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

World U20 C'ships: Ashish Yadav-i silver medal angu

Russia-i Kyiv anasa tanur ka densema nisung asem tepset



VOL. XXIII ISSUE NO. 297 (ADOK 297) DIMAPUR AMUNGNÜ (SUNDAY) LUROI (AUGUST) 09, 2026

₹ 5.00

Longkhüm nung 'Tourist Information' semtu ka yanglutsü

Longkhüm yim, 8th Aug (TYO): August 8 nü Longkhüm nung "Tourist Information Booth" ka Longkhüm Baptist Arogo Pastor, Rev. T. Aka Jamir-i meshiteta sarasademer lapoktsüogo. Iba semtu nung ya Longkhüm lima bulua tetshiba - Tangyim Marok, Mongzü Ki, Longlangba, Mata Kimong, Achen Dang, Fosen Ki, Tzumeya Tsuin, Retu Lung aser ano tanga osangtsüsang balala inokja angutsü.

Indian National Trust for Art & Culture Heritage (INTACH) Nagaland Chapter-i senotsü teyari agüja yanglutsüba 'Tourist Information' semtu ya Longkhüm Village Council nem bendanga agütsür, ta INTACH Nagaland Chapter Co-convenor L. Mefutiba-i metetdaksü.

Longkhüm lima nung otsüsütsü aketba senmang

(heritage) aika moaja lir aser itemji wazüka ayutsü asoshi iba mapa ya mera ka asütsü aser iba yagi meta penzürtem arudang teyari angutsü imlar, ta paisha shisem. Longkhüm nung aliba senmangtemji Aor aser Naga nung meyong ta tangatetba alitsü asoshi paisha ajungshi.

Küm ishika jakdang INTACH-isa Konoma nunga yamai ka yanglutsüogo. Iba den ano INTACH-isa Nagaland nung mapatong tulu kar inyaksü tang maparen teinyakdak lir. Item rongnung Impur nunga ki kar wazüka ayutsü inyakdar, ta pai ashi. Wazüka ayuba maparen dak sentakba nung INTACH-i mapang shia shisatokden balala ayonga arur, ano yakta northeast atema shisatokden kar ayonga akatsü tebilemba lir, ta paisha shisem.

(Maneni tapak 2 nung...)z

Imphal-Guwahati bus service kobi melii tenzüksü

Imphal, August 8, 2026 (Agencies): Manipur Chief Minister Yumnam Khemchand Singh-i Honibarnü Kangpokpi nung Imphal-Guwahati bus service yakta tenzüksüba aser kin ajak asoshi national highways lapoktsü osang metetdaksüogo. Kuki civil society organisations aser Deputy Chief Minister Nemcha Kipgen den ajurutepa sensaksemba sülen iba lemtet agiogo.

Kin o kin tsüngda mepetmesü adokba ajanga May 23, 2023

nungi Imphal-Guwahati bus service anena liasü saka kobi melii tenzüksü aser national highways tongtipang ajak lapoktsü.

Tanü Chief Minister Khemchand-i Kangpokpi district headquarters nung Social Welfare Department kübok Observation Home ka yanglutsü lung azüngtsüogo.

Paisha Mission Vatsalya Scheme kübok beneficiary shia nem itashia agütsüba Rs 4,000 senotsü teyari agütsüogo.

Metümnyo kanga longsoa mungogo

Dimapur, August 8, 2026 (TYO): August 8, 2026 nü Yimkhiung Union Kohima (YUK)-i RCEMPA, Jotsoma, Kohima nung Metümnyo benjung ayongzüka mungogo.

Iba sentong nung Deputy Chief Minister, T.R. Zeliang-i jembidang benjungbentsütem ya pelatepba mapang ka dang masü saka asen maitsü aser külem senmang sayuba mapang ka lir ta ashi.

Metümnyo ya millet arohba sülen amunger aser iba ajanga Yimkhiung nung sobaliba takar, akangkanga noktakba aser alima den tesentaktep tajung aliba nenshir ta pai ashi.

"Tawa Yimkhiung kin aser Zeliang kin tsüngda tesentaktep akangshiba aser kin ana tsüngda adianu tangatetep ayuba atema palar. Iba mapa asoshi tenüngsang agütsütsü dalang aser ibala mapa ajanga kin ana tsüngda dang masü saka Naga nung ajak rongnung temulung lemtap aser teti atema tesentaktep adoker" ta TR Zeliang-isa ashi.

Metümnyo ta alu jenti aroba atema tenüngsang agütsüba dang

masü saka asen alu dak alia asen takümtem nung temoatsütem anguba, tepela aliba aser kibongtem, kidangertem aser lokti den putepa aliba anisüngzük tamaitü lir ta pai ashi.

Iba benjung ajanga asenoki telongjem, aochiba, meranga inyakba aser aria bilemba indang metsüjangtem proksü ajungmesodaktsüdi. Naga loktiliba nung telemsa adokyango aoba mapang ka benjungbentsü ajanga asenok külemi longjemtsü nenshir ta TR Zeliang-isa metetdaksü.

Iba sentong nung Advisor Kuzholuzo Nienu aser Angami Public Organisation President Thejao Vihienuo nati Yimkhiung nung den salem lemsatepa o jembi.

Külen, Honibarnü Multipurpose Hall, Pungro Town nunga Metümnyo benjung mungogo.

Iba benjung ya MLA aser Fire & Emergency Services, Home Guards & Civil Defense, Relief & Rehabilitation Advisor S Kiusumew Yimchunger-i host asü aser Pungro Town Festival Committee ajanga ayongzük.

MMRVCF-i Mkg-Mariani lenmang tekaratiba nung yanglutsü akanger



Mokokchung, 8th Aug (TYO): Mokokchung town nungi Mariani na tsüngta lenmang anasa aliba yimtem lungiemer tentetba 'Mariani to Mokokchung Roadside Villagers Concern Forum' (MMRVCF) pur 8th August, 2026 nü Chungtia yimdak council hall nung telungjem senden ka mena Mariani lenmang dak sentakba nung lemtet kar agiba osang ka ajanga metetdaksü.

Mezüngbuba lemtetji - NH 702 (D) Mokokchung - Mariani lenmang ya concerned department ajanga tekaratiba

nung tsüngküm mongpu ajak nung gari tulu/tila ajak senzütetsüsa yanglutsüla. Tanabuba nung, Mariani to Mokokchung Roadside Villagers Concern Forum nungi temelaba makai contractor shingai teka ia inyaksangshitsü memelatsü, ta lemtetba parnokisa metetdaksü.

Iba Forum nung yimtemji - Ungma, Khensa, Mekuli, Chungtia, Aliba, Changki, Chungliyimsen, Satsük, Japu aser town area nung - Mongsenbai ward, Aongza ward, Kumlong ward aser Yimyu ward alitsü. Iba telemetba ya yim 9

aser ward 4 Chairman densema telemba agia liasü, ta osang ajangasa metetdaksü.

Tang ya talisa Amguri lenmang raksaba agi gari tulubo Mariani lenmang nung dang jajar. Saka iba lenmang kanga majungba ajanga nüburtem timtem marem joko ola adok tenzük. Ibai Mokokchung district atema dang masü kidanger district aika asoshi taküm lenmang lir. Anungji, nüburtemi shimmer yoker lenirtemi temulung agüja yaktatiba nung iba lenmang ya yanglutsüla.



Dimapur nung kiyong aika metsüngbang; kaketshir 1 asü



August 8, 2026 nü Dimapur nung State Disaster Response Force (SDRF) telok ka rong nung mener kiyong ka nung yaritepba angur.

Dimapur, August 8, 2026 (TYO): Honibarnep züngia nungi tzünglu maneni aruba ajanga Dimapur aser temeket nung tesem aika tzü agi metsüngbanga liasü aser tanep 4:00 ako meta Diphuphar nung kaketshir ka electric current agi puseta asü.

Iba nisung ya Tetso College, Chumuokedima nung final year BBA kaketshir Imnamoa Longchar ta jangjaogo. Tanep ajungbena tzü agi ki mobangba mapang inverter ka shibangtsü merandang pa electrocute asü ta kinungertemi ashi. Pa mang Mokokchung district kübok Tuli-i bener ogo.

District Disaster Management Authority (DDMA), Dimapur ajanga tzümetsüng timtem ajurudak tenük yokdar. Tawa tesem aika nung drainage clearance maparen inyakba

ajanga tzü tajungba yimzüka alur aser drainage channels aika nungi tzü yimdoker.

DC Office ketdangsürtem, Dobashis aser DDMA nungi Field Investigator-i yaritepa SDO (Civil), DPA-in-Charge Dimapur ajanga tzümetsüng timtem ajuruba tesem aika sema senzüogo aser osang metetpelaogo.

Parnoki River Belt Colony, Holy Cross School area, SM Colony, Vilhume Colony, K Sachu Colony, Zeliangrong Colony, Purana Bazar B, Fishery Department Gate anasa Kuda Village Road, NST Colony, Industrial Estate Colony, Public Ground Colony, Holy Cross anasa Nepali Basti, Niu Colony, Veterinary Colony aser Rainbow Colony (Burma Camp), Namgalong Colony, Ragailong

Colony, Nesitauo Colony aser Medical Colony dena kiyong aika semdangogo.

Iba mapang SDRF team ajanga tanur ana densema nisung 9 tashi tzümetsüng nungi kümzüko. River Belt Colony nung hostellers pezü tashi hostel ka nungi kümzük aser Holy Cross School area nung nisung pungu taolen mali aliba kümzük.

Kiyong kar nungbo senzüsenbong mesütetba ajanga tang tashi nung tzümetsüng ajanga kilen aser nütsüng kwi dak kongshia lir mejangjatet lir.

District Administration, DDMA aser SDRF kanga kümküma lir aser parnoki local Colony Councils aser lennirtem den amalitepa osangtsüsang metetpeladar.

Tzümetsüng agi kongshitsü akok ta bilemba tesemtem nung Colony Council züngsemtemi mapang shitak nung Administration/DDMA nem evacuation, relief camps amenoktsü mesüra tanga emergency response measures indang osang sangoktsütsü shiogo. Tzü atüngdenba tesemtem nung alirtem dang tzü metsünga alidaki maotsü, electrical poles, wires, transformers, invertors aser tanga electrical installations anasa maotsü tekümdangtsü metetdaksüogo.

Bangdak Colony Council mesüra ketdangpurtemi emergency mesüra electrical hazard ta temulung malemba tatalokba ajak Administration/DDMA nem sangoktsütsü atema ketdangsürtemi ashi.

Spero Meliora Literary Competitive Programme nung Agnh aden



Dimapur, Luroi/August 8 (TYO): 32buba Spero Meliora Literary Competitive Programme August 8 nü Kohima Village Multipurpose Building, Ziekezou nung agiogo. Iba sentong nung Nagaland Angh Nand Kishore Yadav alakteta jaoker liasü.

Sentong nung o jembiba mapang Angh-i, iba sentong 32benbuba kanga takok ngua ayongzüka agiba atema Kohima Village Students' Union aser Dolphin Club nem tenüngsang agütsü. Paisa, Omen "Spero Meliora," koba tetezü "I hope for better things," lir iba ajanga kaketshirtem temaba jenjang tongtettsü atema tejangraba aliba sayur ta ashiba den, timla ajanga takok angutsü atema ajungmesor aser aremzüka inyakba ajanga takok nguteter, ta ashi.

Omen indang jembiba mapang Angh-isa, lanurtem dang arendaka malitsü, tebilemtsü bentettsü atema sentong yanglutsü aser peisasa dak temulung lemteta tejakleni aotsü ajungshi. Swami Vivekananda-i jembiba o ka lephsia pai kaketshirtem dang aramesotsü aser nükjidong madong tashi tanen makai inyaksü ajungshi, aser maongkatem takok tashi agitsü, tetsüdaktsütsü balala koktetyonga aotsü atema jenjang agitsü aser temaba jenjang atongtsü asoshi inyaksü ayongzüka liasü.

Maneni Angh-i, kanga kara melenshia aoba lima ka nung takokji tangar dang nungi balaka bilemertem, kanga junga tongteprateptetertem aser temelenshi den sütepa ainertem meyong lir, ta ashi. Pai, peisasa

dak temulung lemteta akümtsü, arok aroka shidangtsü aser pei tebilemba jangja jangja lemsateptsü atema literary tetoktepbatem yagi kanga tongtibang shilem agir, ta ashi.

Yadav-isa, lanurtem sempet aser yimyayimpong arangtetshitsüba atema sentong ayonger, tesayur, tsürapur aser volunteer tem nem tenüngsang agütsü.

Kaketshirtem aser sentong nung shilem agirtem ajungshia Angh-i parnok dang metetnua dang alitsü, kaketsü aaka azüngtsü aser pei nükjidong peisasa dak temulung lemteta bushitsü ayongzüka.

Iba sentong ya Kohima Village Students' Union and the Dolphin Club, Kohima Village nati "Break the Ice and Steal a March" omen nung ajemdaker ayongzüka liasü.

Kohima nung SIR awareness sentong agi

Dimapur, Luroi/August 8 (TYO): Electoral Rolls, Special Intensive Revision (SIR) dak sendakba nung Nodal Officers, Campus Ambassadors aser Electoral Literacy Clubs (ELCs) tem atema Deputy Commissioner & District Election Officer, Kohima-i ayongzüka Agusut 6 nü DC's Conference Hall nung awareness sentong ka agiogo.

Iba sentong ya "No eligible citizen is left out. No ineligible person is included" omen nung ajemdaker agia liasü.

Sentong nung o jembiba mapang Assistant Election Officer, Kohima, Chisho Swu-i, electoral literacy ajungkettsü aser Special Intensive Revision indang osang tejangja agütsütsü atema educational institution temi koda tongtibang shilem agir iba indang lemsatep.

Paisa, social media putu nung osang ya kanga kara prokshia aoer aser osang tejangja meteta lira democratic value tem akangshitsü asoshi kaketshirtemi tongtibang shilem agitetsü, ta ashi.

Pai ashiba agi, Campus Ambassador temi voter enrolment dak sendakba nung tangazükba agütsüba den temsüa aliba kaketshirtem voter ama züngoksemtsü atema ajungshia aser election ketdangsürtem den toktepratepa parnok ya Election Department aser mezüngoksemdaktsütsü atema stakeholder tem indang map sendakteptsür ama inyaksangshir kaka lir. Paisa, Nodal Officers tem dang

Campus Ambassador tem dang len sayutsü aser electoral inyakyim indang taliba angazükdaktsütsü atema Electoral Literacy Club tem kübok sentong balala ayongzüksü mepeshia liasü.

Sentong nung Chisho-i, polling stations, elector profile aser Assembly Constituency-wise mapping densema district nung election inyakyim indang osang tejangja agütsü.

Revision inyakyim indang jembiba mapang pai, Booth Level Officers (BLOs) temi ki shiai tua partially pre-filled Enumeration Forms tem elector tem nem lemtsütsü aser form tembanga fill up asütsü atema teyari agütsütsü. Ki shibanger lira BLO temi form den parnoki tanaben semdangtsüba anogo aser contact details toktsütsü. Parnoki ki ka asemben semdangtsü, ta ashi.

Elector temia pre-filled form tem ya download sür online ajanga Election Commission's voter portal mesüra Chief Electoral Officer, Nagaland website nem agütsütetsü. Enumeration Form agizükba sülen BLO temi acknowledgement ka agütsütsü.

Maneni sentong nung shilem agirtem nem electoral roll nung züngoksemtsü atema temsüa alirtem indang osang tejangja aser temsüa alirtem züngoksemdaktsütsü aser temsüa malirtem mezüngoksemdaktsütsü atema stakeholder tem indang map metetdaktsü. Ajak senteper school 12 aser college 9-i iba sentong nung shilem agia liasü.

NIRAMAYA Health Insurance Scheme dak sendakba nung training agi



Kohima, Luroi/August 8 (TYO): Department of Social Welfare and with support of PARIVAAR-NCPO (National Confederation of Parents Organization), den longjemmer State Commission for Persons with Disabilities (SCPD) aser Nagaland Parents Association for the Disabled (NAPAD) nati HITARTH Sahayaks tem atema anogo ka asoshi Training-cum-Orientation sentong ka ayongzüka agiogo.

National Trust kübok NIRAMAYA Health Insurance Scheme takok ngua benoktsü aser iba scheme ajungkettsü nükjidong nung iba sentong ayongzüka agiogo.

Sentong ajanga HITARTH Sahayaks (volunteers) persons with disabilities tsürapur aser guardian tem, NAPAD züngsemtem aser State Commission for Persons with Disabilities aser Social Welfare Department nungi staff aser k e t d a n g s ü r t e m longjemdaktsüogo.

Sentong nung State Commissioner for Persons with Disabilities Tongpang L. Jamir tongti o jembir liasü aser Joint Secretary, Social Welfare Department and Secretary, State Commission for Persons with Disabilities Theodore Yanthan aser Joint Director,

Social Welfare Department Imlongzenla natia shilem agia liasü.

Sentong nung o jembiba mapang Tongpang-i, Niramaya Health Insurance Scheme benoka inyakba mapang tetsükdaktsü balala ajangshiba indang lemsatep, aser iba scheme benoka inyakba nung PARIVAAR-NCPO aser Voice of Specially Abled People (VOSAP) nati tongtibang shilem agiba indang metetdaktsü.

Pai, stakeholder tem ajaki longjemmer inyaba atema pelaba lemsatepba den, iba amala telungjem ya scheme prokshia yoktsü aser tajangzüktiem beneficiary tem tonga yoktsü asoshi kanga tongtibang lir ta ashi.

Paisa, HITARTH Sahayaks tem dang parnok mapang bendanga agüja nendaka inyaksü ajangshiba den Niramaya Scheme takok ngua benoktsü atema parnok shilem koda tongtibang iba indang lemsatep.

Commissioner-i, National Trust-i Niramaya Scheme-Cerebral Palsy, Autism Spectrum Disorder (ASD), Intellectual Disabilities, aser Multiple Disabilities ta category

pezü dang ayimjemba indang metetdaktsü.

Sentong nung Joint Director, Social Welfare Department Imlongzenla-ia o tatsüka jembir. Lai, NIRAMAYA Health Insurance Scheme indang aser Unique Disability ID (UDID) card agizüktsü koda tongtibang iba indang tangazükba agütsütsü asoshi department-i teyari agütsütsü ta ashi.

Technical session tem ya disability, NIRAMAYA aser HITARTH initiative dak sendaka aliba onük balala dak ajemdaker shisalen sayurtemi agi.

Sentong ya Executive Member, NAPAD Kevirhebi Mor-i tepala o jembir tembang, shibai State Commission for Persons with Disabilities, Social Welfare Department, PARIVAAR-NCPO, shisalen sayurtem, HITARTH Sahayaks, tsürapur, NAPAD züngsemtem aser sentong nung shilem agir ajak dang kanga pelaba lemsatepa liasü.

Temetettsü kaji Niramaya Scheme atema district shia nungi HITARTH Sahayaks tem shimogo. Osang tejangjaba agitsü atema Cerebral Palsy, Autism Spectrum Disorder, Intellectual Disabilities aser Multiple Disabilities keta aliba PWD tsürapur/guardian temi State Commission for Persons

Longkhüm nung 'Tourist...' (TAPAK 1 NUNGI...)



Senmang (heritage) ya tangshitsü akokba - tobur tajung tesem, ki aser osettsüset tapu balala den ano asenoki tangshitsü makokba – sobaliba kentenmenü, otsüoalem, yartsüngsang, teka mapa inyakba sempet, asenoki itemji tarutsü nung tagitsü senmang kümdaktsütsü ngujem lir, ta paisa inyakdaktsünüba olen kar lemsatep.

INTACH ajanga koba tanü mapa tila ka inyaka yutsür, iba ya yimden aküm nung senso nüburtemi kanga meima, anepalua aser meshimeshia aser tejak tentetba mapa ka ama amshidaktsünür, ta paisa mepishia metetdaktsü.

Longkhüm yim reprangi liso nisungtem dang masü India aser bendang lima tesem balala nungi meta penzürtem arur saka

parnokki anishitsü asoshi 'Tourist Guide' nüngdakba ajiteter. Anungji, yimdeni achayanga itemji anepalutet nungbo kanga ajangtsü, ta tebilemba ka lemsatep.

Tourism yabo jembiba kisüng masü saka mapa dena inyakba maparen ka lir, anungji, atep keno agi tourism mapa sota meyui mulungsentsü melenshir alima tensa den apet jangyumedema aotsübaji kanga tongtibang lir, ta paisa ayongzüka.

Sentong nung Longkhüm Village Council Chairman, Longkumbo-i INTACH Nagaland Chapter-i tsürapur senmangtem wazüka ayutsü asoshi mapa tajung inyaksüba asoshi achayangertem aser ali tenlar tsürapur Imkongsashi parnok ajak dang pelaba metetdaktsü.



August 08, 2026 nü New Delhi nung Indian Institute of Technology (IIT) pur 57buba Convocation sentong nung Ato kilonser, Narendra Modi, Union Education Minister Pralhad Joshi (abelen) aser IIT Delhi Board of Governors (BoG) Chairperson, Harish Salve nunger tangokba noksa nung angur.

Ita trok tsüingda Canada nungi India nunger 3,323 meindokogo

New Delhi, August 08 (Agencies): Taküm küm tenzüker mezüngbuba ita trok tsüingda (Jan-June) Canada-i India nunger 3,323 meindokogo.

2025 küm piyong nung Canada-i India nunger 3,779 meindoka liasü, ajisüaka takümbo ita trok kija nung 3,323 meindokogo. Yamai dang ora tesüiba küm trok tsüingda Canada nungi India nunger teimtiba meindokba kümji taküm asütsü.

2021 küm Canada-i India nunger 603 meindoka liasü, 2022 küm 786 meindok, 2023 küm 1,132 meindok aser 2024 küm India nunger 2,004 meindoka liasü.

Küm shia Canada nungi nisung teimba meindokbaji Mexico nunger liasü, ajisüaka takümbo Canada nungi teimba meindokbaji India nungertem lir.

Taküm June ita tashi nung Canada nungi India nunger 3,323 meindok, aser kasa mapang nung Mexico nungertembo 1,573 dang meindokogo.

Visa anogo süidakja aliba, jenoktsü atema mepishiba magizükba, immigration temzüng alema inyakba aser visa tsütsü aibelen kulitem nung ajemdaker Canada nungi bendangertem meindoker.

Bendang linük balala nungi kaketshirtem meyrjang aika Canada-i oa azünger aser mapa inyaker bendangertema aika Canada nung alir. Ajisüaka joko küm ishika Canada-i bendangertem arua aliba ajema kümdaktsütsü nükjidong nung study permit özüng tesashiba yanglur aser bendangertem aruba azüoktsü atema inyaker.

Iba dak alia Canada nungi ano meindoktsüsa aliba India nunger 7,669 lir, aser iba atemaji ket dang s e r t e m i inyaksangshidar.

Ano külen tanga osang ka nung, taoba ita India Ministry of External Affairs-i, taküm January 1 nungi July 22 tashi nung US nungi India nunger 1,273 meindokogo, ta metetdaktsü.

Union Education Ministry-i ashiba agi, 2023 küm Canada nung azünger India nunger kaketshir 2,33,532 liasü saka 2024 küm nungbo India nunger kaketshir 1,37,608 dang liasü, aser ibaji shilem 41 agi tajemba akümba lir.

Canada nunger immigration policies, alitsü atema jenjang tasakba akümba, shisaliok jenjang tasakba akümba aser 2023 küm India-Canada tesendaktep tamajungba akümba kulitem nung ajemdaker Canada nung India nunger kaketshirtem kanga ajema akümer.

JHARKHAND PAPER LEAK: NSUI-i sorkar nem takhangba trok agütsü

Ranchi, August 08 (Agencies): Honibarnüa Jharkhand state sorkari longkak aiter kaketshirtem den senden amen, ajisüaka telemtetba kecha magiteti tembang.

Recruitment examinations nung paper leak anema longkak aiter kaketshirtemi parnoki akhangba ajak mataloktsü tashi parnoki maneni longkak aittsü telemtetba agiogo.

Minister pongui akümba committee kati mezüng JLKM lenir Devendra Nath Mahto den senden amen, iba sülen Congress-i pusemba NSUI, Adivasi Chhatra Sangh aser Jharkhand Chhatra Morcha den-a senden menogo.

Hokolbar aonunga sorkari JPSC/JSSC Reforms Manch lenirtem den senden amen.

Tesülen minister Sanjay Prasad Yadav-i, "Longkak aitertermi agütsüba takhangbatemji tim dang. Onoki item takhangbaji Chief Minister Hemant Soren nem metetdaktsütsü," ta ashi.

Jharkhand Chhatra Morcha-i sorkar nem takhangba pongu agütsüogo, aser item takhangbatem rongnung 14buba Jharkhand Public Service Commission Civil Services Examination thinenttsütsü densema lir.

NSUI-ia sorkar nem takhangba onük trok agütsüogo, aser item rongnung anogo 90 tsüingda CID nem JPSC aser JSSC examinations ajak bushisüngdangdaktsütsü aser National Testing Agency medem Jharkhand Testing Agency tentettsü takhangba densema lir.

Adivasi Chhatra Sangh lenir Kartik Oraon-i, onoki sorkar dang recruitment examinations nung tribal aser regional oshitem züngoktsü aser ochimashi aliba exam ajak tamagila kümtsütsü atema takhangba agütsüogo, ta metetdaktsü.

Ano külen Higher & Technical Education Minister Sudivya Kumar-i, sorkari email ID ka y a n g l u o g o , [jpsc.jssc.feedback@g mail.com] (mailto:jpsc.jssc.feedback@gmail.com), anungji ibaji ajanga kaketshirtemi exam inyakyim melenshitsü atema peipei tebilemba lemsateptettsü, ta metetdaktsü.

JPSC examinations ochimashi dak sendakba nung tang tashi nung nisung 19 puogo. Iba ken o dak sendakba nung July 28 nungi tang tashi nung taoba mapang JPSC chairman L Khiangte dang pezüben asüngdangyaogo.

UPI atema sen magitsü saka MDR atemabo agitsü: Centre

New Delhi, Luroi/August 08 (Agencies): Hondibarnü Centre sorkari, Unified Payments Interface (UPI) ajanga sen transaction asüba atema sen (charges) magitsü saka tarutsü nung Merchant Discount Rate (MDR) atemabo sen tera agitsü, ta metetdaktsü.

Hokolbarnü Lok Sabha nung Payment and Settlement Systems amendment Bill ka agizükogo. 2007 küm agizükba Payment and Settlement Systems Act ajanga UPI aser notified electronic payment modes atema sen agitsü asoshi banks aser service providers nem temelaba agütsütsü asoshi sorkar nem tashi agüja lir.

Ministry of Finance-i, Person-to-Person (P2P) UPI transactions ya maneni angati dang asütsü, iba denji külemi merchant teimbaka angati asütsü, ta metetdaktsü.

Sorkari ashiba agi, MDR atema sen agira ibaji merchant transactions kar atema dang asütsü; senji tera dang agitsü.

Taxation and Other Laws (Amendment) Bill dak sendakba nung Congress lenir Jairam Ramesh-i tiyazü osang proker, ta Finance Minister Nirmala Sitharaman-i Ramesh aitsüogo.

Sule-i Centre dang FCRA Bill ya JPC nem agütsütsü mepishir

New Delhi, August 08 (Agencies): Honibarnü NCP (SP) working president Supriya Sule-i Centre sorkar dang, Foreign Contribution (Regulation) Amendment Bill, 2026 ya agienadoktsüla mesüra maneni iba bill asadangtsü atema Joint Parliamentary Committee (JPC) ka nem agütsütsüla, ta mepishi.

Baramati nungi Lok Sabha MP, Sule-i, Parliament nung iba bill mebenokdang iba ya jungjunga asadangtsü atema yimtenren party ajak nem maongka agütsütsüla, ta ashi.

Laisa, "Tang aliba FCRA Bill ya onoki magizüker. Iba bill agentsü atema sorkar renema melira iba bill ya asadangtsü atema JPC ka nem agütsütsüla. Tashitait democracy ka nung langka anema nokdakba kijaibo meperir. Asenoki külemi mener iba atemaji o lemteptsüla," ta ashi.

FCRA bill tasenba ya agizüka özüng kümra ibaji ajanga bendang linüktem nungi senotsü teyari anguba melungtet teloktem madak sorkari tashi amshitsü, ta aikati bilemer.

Sule-isa, bendanglen nungi teyari anguba ajakji melung melemibo mebilemetsüla, kechiyong item ama senotsüji ajanga shisaliok aser healthcare tsütsü mapa tajung aika inyaker, ta ashi.

Laisa, bendanglen nungi anguba senotsüji temesebpa mozü shibelenba mesüra kiralongra ama özüng alema inyakba mapatem den sendaktepa lira temerenshi alitsüla, ajisüaka bendanglen nungi teyari anguba melungtet teloktem ajak dak melung melemi bilembajibo tai, ta metetdaktsü.

"Gates Foundation aser USAID ama organizations-i küm aika mapa tajung jenti inyaka arudar. Kechiba asenoki bendanger senotsü agi yariba organisation ajak dak tenük yoker?" ta laisa asüngdang.

2019 küm nungi 2022 küm tashi nung India nung melungtet telok 13,520 nem bendanglen nungi sen crore 55,741 agüja liasü.

July 15, 2026 anogo tashi nung India nung active FCRA registrations 14,449 lir, registration 22,498 thinenttsüogo aser 15,212 expire süogo.



Jabili Development Corporation Limited
(An Undertaking of Ao Senso Telungjem, Dimapur)
Senden Riju, Purana Bazar (Near ISBT),
East Dimapur-797112, Nagaland
Phone: 9863566932 email: info@jdcl.co.in

SENDEN RIJU AMSHITSÜ ATEMA EXPRESSION OF INTEREST MESHIR

Senden Riju aser temeket tajungba kuma yanglushitsü aser item ali aser kiojenji amshia rongsen renlokdaktsütsü jangrartem nungi 'Expression of Interest' meshir.

Iba tesem ya ASTD meyong ali acre 5 nung lir aser idaki tang ariju tuluka aser tilaka yanglua lir aser ali tazüng acre 1.5 shi lir.

Iba tesem ya lokti senden, kiyir benjong, asentenshi, shisatokden aser kenten menü sentongtem aser trade fair alitsü kanga tajung lir.

Anungji, iba tesem ajanga senotsü ajangzükteta amshiner, Aotsür Aor rongnung tejangrar Professional Developer, Operator aser Management Group aser Individual temi August 29, 2026 tashi nung Expression of Interest agütsütsü metetdaktsür.

Iba dak sentakba temetettsü aser teinyaktsü tejangja JDCL website jdcl.co.in nung angutsü.

Date: August 09, 2026.

Sd/-
Executive Director, JDCL

Contact: +91 9863566932 | Email: info@jdcl.co.in | Web: www.jdcl.co.in

IN THE HIGH COURT
(The High Court of Assam, Nagaland, Mizoram & Arunachal Pradesh)
KOHIMA BENCH
MAC APPEAL NO. 03 (K) / 2026
National Insurance Co. Ltd.
- Versus -
Smti. Apu Sen & 2 Ors.
1. Shri. Mirrangthem Jacob Meitie,
S/o Jaikul Meitei, R/o Awang Leikinthabi Village, P.S. Sekmai, District - Imphal West, Manipur. Pin Code - 795136
(Driver of the Offending Vehicle)
.... Respondent
NOTICE UNDER ORDER V
RULE 20 OF THE CODE OF
CIVIL PROCEDURE, 1908.

Whereas the above noted appellant has filed the aforesaid **MAC Appeal No. 03 / 2026** challenging the Impugned Judgement and Order dated **03.10.2025** passed by the Member, Motor Accident Claims Tribunal, Dimapur, Nagaland, before the Hon'ble Gauhati High Court Kohima Bench, wherein you have been impleaded as respondent No. 3. That by Order dated **24.07.2026** you are hereby called upon to appear before the Hon'ble Court after **4 Weeks** from the date of the order at **10:15 AM**, in person or by a pleader to act on your behalf. Take Notice that in default the matter will be decided ex-parte.

Signed and seal by the Order of this Court on this the **28th July, 2026.**

Deputy Registrar (Judicial)
Gauhati High Court Kohima Bench

IN THE HIGH COURT
(The High Court of Assam, Nagaland, Mizoram & Arunachal Pradesh)
KOHIMA BENCH
MAC APPEAL NO. 03 (K) / 2026
National Insurance Co. Ltd.
- Versus -
Smti. Apu Sen & 2 Ors.
1. Shri. Bijoy Ningthoijam,
S/o N. Jugal Singh, R/o Sagolband, Bijoy Govinda, P.S. Imphal West, District - Imphal West, Manipur. Pin Code - 795004
(Owner of the Vehicle)
.... Respondent
NOTICE UNDER ORDER V
RULE 20 OF THE CODE OF
CIVIL PROCEDURE, 1908.

Whereas the above noted appellant has filed the aforesaid **MAC Appeal No. 03 / 2026** challenging the Impugned Judgement and Order dated **03.10.2025** passed by the Member, Motor Accident Claims Tribunal, Dimapur, Nagaland, before the Hon'ble Gauhati High Court Kohima Bench, wherein you have been impleaded as respondent No. 2. That by Order dated **24.07.2026** you are hereby called upon to appear before the Hon'ble Court after **4 Weeks** from the date of the order at **10:15 AM**, in person or by a pleader to act on your behalf. Take Notice that in default the matter will be decided ex-parte.

Signed and seal by the Order of this Court on this the **28th July, 2026.**

Deputy Registrar (Judicial)
Gauhati High Court Kohima Bench



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 09, 2026

Tekümtet asoshi inyakba

Alima nung alir nisung shia atema tanüla tekümtet ya kanga tongtibang lir. Tekümtet tetezü kümzükba. Ajisüaka, tekümtet anguba ya ken atema mesüra kenü langka ka inyaker toktsütsüba masü saka tekümtet yabo maneni inyakyonga aotsüba mapa ka lir. Atangji, tekümtet anguba ya asenok ajungba agi mesüra asenok dak alangba agi masü saka Tsüngrem taochi ajanga anguba mapa ka lir. Aji oda, Laishibai ashir, Tsüngremi asenok kümzükba ya mesüra tekümtet anguba ya asenoki inyakba agi masü saka aji Tsüngrem sempet. (Efesa 2:8). Tetezü asenoksasa asenok kümzüktsüsa asenok dak tashi mali, saka Tsüngrem taochi agi asenok nem tekümtet ya sempet ka amato agütsü. Aji oda, tekümtet ya Tsüngremer angati sempet lir. Ibai Tesüngmangtsü. Sempet tetezü sen agi aliba masü, asenoki aazükba masü saka angati anguba temoatsü. Ajisüaka, iba sempet ya odang amer kazütsüba sempet ka masü saka sempet denji mapa inyaksü dena agütsür. Asenok kümzükba mesüra asenok nem tekümtet sempet agütsüba agi ajanga Tsüngremi asenok dang akhidang menaba temenen madak dang masü saka ano tarutsü mapang menatsü aliba temenentem madaka takok agütsür. Tetezü, tekümtet sempet ya raraba nok nü ang ka mesük, iba yagi temenen den raratsü. Iba jagi ashir, tekümtet ya kenü atema dangbo masü saka alima nungi mepila tashi inyaksüba mapa ka lir. Kodang asenok nem Tsüngrem tekümtet agütsür, asenokji tangang tasen poktetba taküm ka ama akümer (2 Kor 5:17). Tekümtet mapaji yang nung jagi tenzüker. Aji oda, kodang asenok taküm ya tasen poktetli ama akümer, iba anogo nung jagi Tsüngrem den jaja tenzükdang anogo shia asen taküm tasenba -tasenba yanglulokyonga aotsü Tsüngremi imlar. Kodang asenok nem Tsüngremi tekümtet sempet agütsür, idangji asenok pelar aser iba tepelaji mesamadaktsüi tanüla temeshi agi asenok sünga alitsü Tsüngremi imlar. Kodang asenok Tsüngrem nungi tekümtet angur, asen takümü Tsüngrem meyong akümer, anungji asenok taküm ya asen mulungba nung masü saka Tsüngremer mulungba nung aotsü. Laishibai ashir, Tsüngremi asenok nem Pa temulung chia inyaksüsa mulungtetdaktsütsü aser inyakdaktsütsü asoshi asen mulung nung inyaker. Ibai asenok atema teshisadangtsü aser teinyaksü mapa tuluka lir. Tsüngrem atema inyaksüsbajia Tsüngremi dang asen mulung nung mulungtetdaktsür aser inyakdaktsür. Aji oda, Khristan taküm kati angateta inyaksüba mapa kaji asenoki anogo shia Tsüngremi asenok dak temulung lemtettsüsa kanga kümdanga inyaksüla. Ajisüaka, ano külen Tsüngremi dang asenok nem Pai mulungba inyaksü mulungtetdaktsür aser inyakdaktsür ta bilema Laishibai ashi ama kechi inyakdir, "kangkokangji mesüra tashishiba kecha medeni inyaksüla." Filipi 2:14. Itemji Tsüngremi agütsüba tekümtet mapatemji lir. Kodang Tsüngremi asenok taküm nung inyakba metetdir, asenoki Pa den külemi Pai mulungtetdaktsüba aser inyakdaktsünüba angateta inyakra, iba jagi asenok dak tekümtet alibaji ano tali tejangjaba meteta inyaksü.

OLEMSABANG

POLITICAL PARTY-TEM SEPLASEPSHIBA ANGUDANG SUNGMANGER....!!!

~ L. Kika Pongener

Asen Naga lima nung Political Party teimba ka nukjidong takang ka mali sepla-sepshiba angudang nuburtem sungmanger....!!! Aor shin o ka...."Meja antsü tayudak maka belenshiba"....ibaji dang mesuka lir. Asen Naga nung Political Party teimba ka....Tanur yimdong kazür kisen asayar 'Sungtok ki asür'....Khen yangluli aser khen raksali ta asüba dang mesuk. Ano Politician-tem teimba ka school tanur tokolok mechirar....Küm shia 'Fail' ser School melenshiba....Küm shia School Uniform sentsü (Colour) balala melenshiba dang mesuk. Manganutsü mali, asen Naga lima nung Political Party teimba ka nukjidong takang ka makaba Party danga ta parnok mapa agi sayur. Ano Naga nung Politician-tem Opposition kata mali Ruling Govt. dak oa züklokbaji....Nujiso bushiba mapa yakta telemtetba ka agitsü atema ta jembir....Ano Party karbo Ruling Govt. dak züklokbaji 'Kidangi shilangba' (Coming Home) dang ta jembir....Saka ajakji oyim-osu tajung agi jembir dang ashi...Politician-tem teimba ka linuk aser nubur meimba masü; pei yangkü asüngtsü bushir dang ta parnok mapa jagi sayur. Naga nung Politician-tem teimba ka tajangzük aser maongka bushir (Opportunist) danga ta nuburtem-ibo bilemer.

Taoba küm NDPP Party NPF Party den loktepba ngua nubur aika kanga aoksaogo....!!! Atangji, kanga arok-aroka shisadanga; iba tatalokba-to shinga-ia meimlaba mapa ka atalokogo. NDPP Party-ji tenzüker ano küm aikabo masü....Ni aibelener ka mesura....Party 'Manifesto' nung....Naga lima nung temelenshi (Change) tasen bener arutsü nukjidong yua aliba; ano iba nukjidongji mapa küma meinyakdang....Party nungja (Nomenclature) dena mali sama-adokogo. NDPP Party-ji Ruling Govt. nung Majority Party ka liasü....MLA teimba adoka aliba Party ka liasü....Saka NPF Party MLA ana (2) dang adoka aliba Minority Party ka dak oa zükloktsü sentong atongbaji tesungmangtsü mapa ka ta ashitsü akok. Aser iba loktepba "Kidangi meyipa shilangba" (Coming Home) dang ta Party anaprongla nung lennirtemi ashiba angazükogo. Ashiko, taruba Election nungji NPF o BJP na Alliance yanglutsü tsübuba agi....Ibaji matalokdaktsütsü jilia NPF denji loktepba asü (?)....ta nuburtem-ibo bilemdanger. Mesura taruba Election nungji NDPP Party BJP den Alliance aliba ya pilatsü aser raksatsü tebilemba ali asü (?)....ta-ka nuburtem-ibo bilemdanger. Ibajiang, Majority Party kaji Minority Party dak oa züklok sudi ta bilemer.

Ano taoba ita Tir Yimyim osangkaket; Chiteni (July) 12th anogo nung ; Rising People's Party (RPP) NPF Party den loktepba osang ka adokba ngua nubur aika kanga aoksaogo....!!! Ajiser, Party ana loktepba 'kidangi shilangba' (Going Home) mapa ka danga ta RPP Party President-i ashiba nguogo. Ni aibelener ka mesura; RPP Party ya Election nung khen anaben-bo toktepba aser MLA karbo adoker....Assembly nung mener shilem agiba mangazük. Aji oda, RPP Party nukjidongji tanang (Sweet) asü mesura tako (Bitter)...??? Ibaji ano nuburtemi memenakdang. Atangji, RPP Party-ji ano nubu junga inteta (Matured) makümdang....Tanga Party ka dak-ang oa züklokba osang angudangji nuburtem kanga aoksar....!!! Aji oda, RPP Party ya Assembly nung MLA ka danga mena meli-aka; mapang shia sorkar-i nubur temulung masütsüsa inyakdang; sorkar anema ola adokba ngua; nuburtemi kanga temulung chia repranga aruogo. Yongji, RPP Party dak tarutsü nukla, mangdang aser teimla ka nuburtemi yua liasü. Ajisuaka, iba nukla aser mangdangji tang sepla-sepshiba mapa yagi meshi-meshia samaogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tangbo missionary tem teimbaka lanurtem asütsü: Rev. David Ro



August 08, 2026: Manila, Philippines nung Arise Asia 2026 Congress tembangba sülen osangbener den jembidang Rev. Dr. David Ro-i, alima nung mission wadang nung temelenshi tulu adokdar aser tangbo missionary temji teimbaka alima nung tesem tamajungtibatem nungi adokba missionary tem asütsü, ta ashi.

"Tesüiba küm pongu, ter, terpongu mesüra küm metsü den medemdangra tangbo mission mapa inyaktertem ya khenyongi balaka," ta Rev. Ro-i ashi.

Tawa Manila nung anogo pongunü tashi Arise Asia senden nung linük 64 nungi lanur 4,000 shi aden aser tatembangbuba sentong nung lanur 341-i alima tesem balala nung missionary inyaksü tenangzükba agiogo.

Arise Asia executive director Ro-i, tangbo missionary tasenpurtemji teimbaka lanurtem asütsü, anüolen

linüktem nungi missionary tem kangabo malitsü, rara aser sensak tia aliba tesemtem aser reshikangshi aliba tesemtem nungi missionary tem aika adoktsü, anungji mission mapa inyaksü atema lenla aika nung parnok kanga tetemsü asütsü, ta ashi.

"Timtem aliba tesemtem nungi adokba missionary tem jagi timtem aliba tesem balalai oa nüburtem tenzüktettsü. Ayongayonga aliba tesemtem nungi adokba missionary temi timtem aliba tesemtem nung tenzükba dang nungibo timtem aliba tesemtem nung tenzüksüji timtem aliba tesemtem nungi adokba missionary tem atema temelaba asütsü," ta pai ashi.

"Mission lima aser Arogo lima - mission wadang nung nokdaksüpur tasenpurtem atema asenoki renemshitsütsü nüngdak. Tsüngremi yamaji inyaker," ta Ro-i ashi.

Arise Asia Congress senden agia aruba rongnung 2026 Congress ya sentong tulutiba liasü. Taruba Arise Asia Congress ji küm asem sülen agitsü. Iba mapang tashi nungjibo Arise Asia movement ajanga Africa, Latin America, Middle East, North Africa aser Central Asia tesemtema ayimjemtsü nükjidong lir, ta Ro-i metetdaksü.

Manila nung Arise Asia 2026 Congress nung kaketshirtem aser lanurtemi frontier missions aser Khrista osangtajung prokba wadang atema jembia liasü. Arise Asia ya "For the Joy," omen nung ajemdaker agi.

Anogo pongunü Congress nung tepela tapu balala shisadanga liasü; mezüngbuba anogo omenji tepela, tanünübuba omenji Yisu sülen anidakba tepela, tasemnübubaji bendanga agütsüba tepela, pezünübuba omenji akanga nokdakba tepela aser tatemnübuba omenji teti atema tepela liasü.

July 30 aonung Manila nung aliba Christ's Commission Fellowship (CCF) Central nung lanur 341-i mission wadang inyaksü tenangzükba agi aser July 31 nü iba sentong tembanga liasü.

Arise Asia ya David Ro-i tentetba lir. China nunger pastor aser Arogo nung lenir kati dollar sen 5,000 tenla agüja pai Arise Asia ya tenteta liasü.

ANOGO ABEN TSÜNGREM DEN

NÜTSÜNGTEM
SENSHITSÜ SHINBA

'Idangji Yisui parnok dang ashi, "Taonung nenok ajaki ni toktsür jena aotsü, kechiaser ya zülua lir, 'Ni sannüker dak azüktsü aser san telok prokshidaktsütsü.' Mathi 26:31

Yisui nütsüng terana shim aser parnok den Pai apok-khuret ajak lemsatepa wadang nung külemi tenzük. Nütsüngtem otsü kanga tongtibangsa azünger aser jembiteber, saka nisunger yimya ama parnoka tashi mait jenti liasü anungji parnoki mapang ajak nungbo tesayur mesentoki maliasü. Kodang putiongertem aser nübur tamburtem nungi telok tulu kadi nok aser süngsü bener Pa aputsü aru, nütsüngtem ajaki pa kija toktsür jena oatok, atangji kopi melii Yisui jembiba o ataloka Pa nütsüngtem jenshi.

Asenok taküm nung timtem, maksü, tamakok, tasüba, nüngsen balala ajurur, idangji asenoki tekümsüker Yisu toktsür aor asü? Tsüngrem o-i ashir, Pa asen jenokdak aser tashi timtem nung anasatiba teyarir. Temeim adianu na küm aika Tsüngrem den ajar saka ne temepishiba kar melangz?ba agi na joko lula akümer asü? Asenoki mamali Yisu apu, rishikangshi, tepset saka takok nung shia aru. Shia aruba tashi tulu lir, Pai len anitar anungji Pa metoktsüli.

SARASADEM:

Yipru mopung ama tetendangba aser anokshiba jenti aruraka, Yisu ni ne dak jenokdi aser na nungi jena moli.

Amen

Beijing Zion Arogo nung lenir 8 anema ken o angadangtsü



Pastor Wang Lin, Pastor Gao Yingjia, Wang Zhong, Pastor Yin Huibin, Pastor Liu Zhenbin, Pastor Lin Shucheng, Pastor Wang Cong aser Wu Qiuyu nunger noksa nung angur.

August 08, 2026: China yimtiba, Beijing nung aliba Zion Church tentetsang pastor Ezra Jin bo tepuokdak nungi chiokogo, ajisüaka tanüngba lenir 8 anemabo ken o angadangtsü.

Arogo nung lenirtem atema ken o jembitsürtemi ashiba agi, ashikülak mapa inyaker aser ozüng alema business inyaker ta Khristan pastor tem nem tai tongloksüogo.

August 10, 2026 nü osangbenertem senden ka

ayongzüka agitsü aser August 14 nungi August 18 tsüngda parnok anema ken o angadangtsü.

Khristan melungtet telok, China Aid-i ashiba agi, China Tir, Xi Jinping US-i oa Tir, Donald Trump ajurutsü lir, ibayongji ketdangsertemi tekeraba nung Arogo nung lenir 8 ji anema ken o angadangtsü ariteper, ta metetdaksü.

Yaküm October ita nungi tenzüka Chinese Communist Party (CCP)-i independent house church network anema

mita aoer.

Zion Arogo nung lenir pongu- Wang Lin, Gao Yingjia, Yin Huibin, Wang Cong, Liu Zhenbin aser Lin Shucheng nungeri ashikülak ajanga tenla million 10 benden, ta parnok nem tai tongloksü.

Zion Arogo nungisa Pastor Wang Lin, Wang Zhong aser Wu Qiuyu nungeri ozüng alema business inyaker; parnoki CCP dang nungi temelaba memeshii yimsü dak sendakba kaketterem ayokba ajanga sen million 2

aazükogo, ta parnok nem tai tongloksü lir.

Tang parnok ajak Guangxi nung aliba Beihai Detention Center nung pua lir.

Ajisüaka Zion Arogo nung lenirtemibo sangdong ka ajanga, tamangertemi pei sasa melungteta tenla agütsüba, pastor tem nungita yariba aser theological shisaliok agütsüba ya ozüng alema masü saka akhidang nungi yimsü temeden kübok inyaksangshia aruba lir, ta metetdaksü.

Taoba ita China ketdangsertemi Pastor Ezra Jin bo chioka liasü. Taküm April ita nung China Tir Xi aser Trump na senden amenba sülen July ita nung pa chiokba sülen pa America-i oa par kibong den longjemogo.

Pastor Ezra Jin chiokba sülen par kibongi US Tir, Donald Trump dang pelaba aser sarasadem agi nungita yarir ajak dang pelaba lemsatepa liasü.

Pastor Jin'er kibongi sangdong ka ajanga, "Nenoki sarasademtsüba aser nungita yariba atema ajak dang pelar. Onoki atangji sayatenya mapa kuli süa nguogo aser onok kanga pelar. Iba tesüngmangtsü sayatenya atema onoki Tsüngrem nem tenüngsang agütsür. Onoki US Tir Trump

aser pai aniba administration danga pelar," ta metetdakja liasü.

Arogo nung lenir 8 anema ken o ngadangtsü aliba dak sendakba nung Pastor Ezra Jin'er jala Grace Jin Drexel-i, "Taküm September ita nung Chairman Xi-i Washington semdangtsü lia iba ya Arogo nung lenirtem anema aritepa ken o angadangtsü atema lir, ta aikati bilemer," ta metetdaksü.

House of Representatives Select Committee on China Chairman, Rep John Moolenaar-i, "Taoba ita Pastor Ezra Jin chiokba atema pelar, ajisüaka tang tashi China nung yimsü temeden anema inyaker. Tir Trump-i alima tesem balala nung Khristantem reshikangshiba ya pai anemer, ta shiogo aser iba nungji China-a densema lir," ta metetdaksü.

"CCP-i tangsa Zion Church nungi lenirtem 8 ji chioktsüla, iba denji külemi Pastor Gao Quanfu densema underground Arogo nung lenirtem ajak chioktsüla. Lenirtemji pei kibong züngsemtem den tanaben longjemdaksütsüla, iba denji külemi peii melungba yimsü amanga benshitsü atema China nung senso ajak nem temeden agütsütsüla," ta Rep John Moolenaar-isa metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züluyu

(n) tongtibang nungdak tezüluba nung rizüngba (documentation)

* Asenok lipok otsü züluyu nung makaba agi amadoker.

Zünga

(n) küm anasemka tsüngda asor medemerterm, külem medemer agi telok kümer mapa inyakba telok (same age group, work as a team)

* Ozü zünga pur nisung ajak agi 21 lir.

OLONG PAITEP # 7592

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademang tembang - (4)
- Tarutsü indang ashitem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 7591 TELANGZÜBA**TIPIEN :**

- Shiki, 5. Ajunga, 6. Wanu,
- Rarabangsen, 10. Nüktapangta,
14. Tera, 15. Adianu,. 16. Anasa.

LANGTSÜNGLEN :

- Suwar, 2.Khu, 3. Ani, 4. Tasen,
- Alia, 8. Azü, 9. Senti, 10. Nisan,
- Putu, 12. Atasa, 13. Tir, 14. Tan.

NAI-A YA METETTER

India tsür Renu Dhariyal-i alima nung tetsürtem rongnung kou talangtiba otsü tasen yangluogo. Renu ya Uttarakhand kübok Haldwani nung alir aser la kou 271.50 cm (8 feet 10 inches) talang lir aser iba jagi "longest hair on a living person (female)" Guinness World Record yangluogo.

Renu ya content creator aser YouTuber ka lir aser lai tetsürtem den beauty tips lemsateper.

Ukraine tsür Aliia Nasyrov-i kou 257.33 cm (8 feet and 5.3 inches) talang ayuba indang otsü tasen yangluteta liasü saka ibaji Renu-i ajatetogo.

Assam sü ataker kati gamosa ajanga Zubeen Garg tushir**Guwahati, August 8, 2026**

(Agencies): Dibrugarh district nung Khowang nungi sü ataker kati Assamese kentener asür Zubeen Garg nem tetushi tulu agütsüogo.

Iba tetsür sü atakeri gamosa balaka ka atakba nung asür Zubeen indang ken tugu den pai jembiba olen tugu takokka lir.

Sütaker ya Dalimi Lahon Gogoi lir aser la ya Katakipukhuri

Ahom Gaon nung alir. Lai nungtugu kentener nem tetushi agüja traditional handwoven masterpiece ya purapiteta yangluogo.

Iba gamosa ya 25 feet talang lir aser ita pungu jungnüa nung renem. Dalimi-i Zubeen Garg asüba sülen ita ka shi lir iba gamosa ataktsü tenzüka liasü.

Teka agi atakba gamosa nung Zubeen Garg indang ken

Mayabini, Momor Sakiti Jole, Diya Ghurai Diya, Sapon Rongor Tikha Tumi, Roi Roi Binale aser Andha Akash dena nungtugu ken 9 indang kenjangtem lir. Iba dak alia kentener den sendaktepba olen 9 enoksema lir.

Lai Zubeen Garg kanga sapur aser Assam nung traditional weaving maparen ajanga pa indang senmang taküm lidaktsünür ta Dalimi-i

Tripura sorkari Google Translate nung Chakma oshi bendenloksü**Agartala, August 8, 2026**

(Agencies): Tripura sorkari Google Translate nung Chakma oshi bendenloksü atema mapa tenzüko. Iba oshi wazüka ayutsü aser ajungkettsü atema sorkari Chakma olung 50,000 shi bendener.

August 7, 2026 nü mezüngbuba Chakma Language and Script Day 2026 benjung amungdang Industries and Commerce Minister Santana Chakma-i iba osang metetdaksü.

"State sorkari Tripura nung minority kintem oshi den külemi Chakma oshi renlokdaktsütsü

atema tenangzüka lir. Tripura nung Chakma script indang putiotsü talangka lir aser kaket o magazines aika iba oshi agi zülüogo" ta Santana Chakma-i ashi.

Tanur asüdag nungi angazütsü ajungmesotsü atema Chakma script ya Anganwadi centres nung benshitsü ta laisa ashi.

"Kin ka indang maitsüji putiotsü, sobaliba aser tetsü oshi nung tera yanga lir. Tripura nung lisopur kin 19 shi lir aser kin shia indang oshi aser sobaliba khenyongi balala lir aser Constitution-i itemji wazüka

ayutsü aser ajungkettsü temeten agütsür" ta Tourism Minister Sushanta Chowdhury-i ashi.

Tan academic session nung sorkar school 123 nung Class I nungi VIII tashi Chakma oshi sayur. Chakma oshi jembiba tesayur 172 lenisüba kübok kaketshir 4,000 temai oshi angazükdar ta pai ashi.

SCERT ajanga Chakma textbooks angati agütsüogo aser sorkari secondary o higher secondary levels nung Chakma oshi sayutsü atema meratem tenzüko ta Minister Chowdhury-isa ashi.

Centre-i Arunachal Pradesh nung tesem 27 jangjatsür**Itanagar, August 8, 2026**

(Agencies): India sorkari Arunachal Pradesh den asüngdangtepa Survey of India indang official maps nung tesem aser features 27 tashi jangjaogo.

Iba mapaya uniform & accurate recognition den külemi public awareness tajungba kümdaktsütsü aser administrative o cartographic maparen asoshi tali jangjashitsü atema lir ta Press

Information Bureau (PIB)-i sangdong ka nung ashi.

Tangajiteta aliba tesemtem ya Arunachal Pradesh kübok tesem balala nung lir aser land areas, mountain passes, lake aser monument dena lir.

Item ya Longju, Maja, Bisa, Dzo La, Riza La, Pukur La, Thag La, Sambho Sarovar, Bara Kundun, Chhota Kundun, Dhan Bari, Pritnagar, Buddhamandir,

Jairampur, Teritnagar, Ramnagar, Jaswant Garh, Sagar, Padma, Jyotinagar, Baisakhi, Sher-e-Thapa Memorial, Chhota Ropuk, Bara Ropuk, Shivaji Nagar, Sunpura aser Kamlang Nagar lir.

Survey of India maps nung tenüngtem densemba ajanga tesemtem shitak ajitettsü aser tenüng balala majatsü ta sorkari ashi.

Russia-i Kyiv anasa tanur ka densema asem tepset



Kyiv, Luroi/August 8 (Agencies): Russia-i anüing ajanga Ukraine yimtiba Kyiv aser yimti temeket nung tesem kar amakba sülen tanur ka densema nisung asem tepsetogo, ta Ukraine nunger ketdangsürtemi metetdaksü.

Russia-i Honibarnü Kyiv tezülen Boryspil district nung tesem asem maka liasü, ta regional administration tekolakba Tymur Tkachenko-i ashi. Iba lendong nung ano nisung asem yiruogo.

Ukraine indang air defence tashi meiti aliba mapang Russia-i asendeshir iba linük aiben maka arudar.

Honibarnü Kyiv kübok district ana nung missile khaloktsüba sülen mi adok aser air raid alert ola agüja liasü. Kyiv nung alirtemi ashiba agi, bomb apokba ajanga kitem anokshija liasü.

Russia indang ballistic missile tem ya ola speed dang nungi tenetben agi tekaraba ayimer aser target tem tonga aoba mapang kanga kara yimzüka alur, koba Ukraine indang defence-i menokdangteti arudar.

Ukraine ket nung aliba air defence tem rongnung United States-i agütsüba Patriot air defence systems agi dang item missile tem khadangteter, saka parnok iba missile agi anüngba mapang ka lir. Kyiv nung ketdangsürtemi ashiba agi, missile tem khadangtsü atema parnok dak tashi mali.

Iba hopta tetenzüklen tir Volodymyr Zelenskyy-i, 2025 küm den medemdangra 2026 küm mezüngbuba shilem nung parnoki air-defence missile asemsü nung ka dang agizüka liasü. Paisa, US

aser Israel nati Iran amakba ajanga parnok air-defence missile tem agi anünger, ta ashi.

Ukraine sorkar adviser temi ashiba agi, Russia-i ita ka nung ballistic missile 100 shi yoktettsü. Parnokisa, asükwa asülokba sülen tali amaktsü atema Moscow renemdar, ta shisem.

Kasa mapang nung US Senat-i Russian energy export tem dak rangloker sanctions bill tasen ka agizükogo, kong Russia indang totzü aser gas aliba linüktem dang 100 percent tariffs meshitsüba densema lir.

Iba jenjang agiba ya Zelenskyy-i pelashishia agizükogo aser European Commission tir Ursula von der Leyen-ia, iba ajanga Russia tashi meiti kümdaktsütsü, ta ashi.

Iran-i ADNOC rong amak: UAE

Abu Dhabi, Luroi/August 8 (Agencies): Strait of Hormuz nung United Arab Emirates indang oil company rong ka amakba atema Honibarnü UAE-i Iran aitsüogo, aser ashiba agi iba ya tzüyim nung rakzükrakdemba ka lir.

ADNOC-i, parnok indang rong ka Honbarnü missile ka agi maka liasü, saka tensa azüoka lir ta ashiba State news agency WAM-i metetdakja liasü.

Iba sülen mapang tatsüka lir UAE Foreign Ministry-i ADNOC rong amakba atema Iran aija liasü.

Ajisüaka iba totzü abenba rong amakba indang osang tejangja telok kati danga magütsü. Lendong nung nisung yiruba indang osangbo kecha mali.

Iran nung rara metenzük tsüngda alima indang totzü aser liquefied natural gas pongusü Oman aser Iran na

tsüngda iba tzü lenmang tilaka yagi süia liasü. February ita 28 nü nungi tenzüka US-Israel nati Iran ama tenzükbä sülen iba tzü lenmang nung rong senzüsenpong nung tetsükdaksü adoka arudar.

Ministry-i, iba rong amakba ya tzüyim nung rongtem sadem sadema senzütsü atema U.N. Security Council bangzüng anema lir ta ashiba den, tzüyim nung shishilemba dang amshiba rongtem maka rakzükrakdemba atema Iran indang Revolutionary Guards aitsüogo.

Iran-isa, rongtem amakba anentsü aser iba tzü lenmang ya tanaben lapokshitsü ayongzükogo. Abu Dhabi state oil company ADNOC ya alima nung energy producers tulutiba rongnung ka lir aser parnoki totzü, natural gas aser refined product tem alima ajungai yoker.

US-i Australia nung rare earth mine atema \$400m entoktsü



Washington, Luroi/August 8 (Agencies): United States Department of Defense-i, alima nung mezüngbuba scandium atema primary mine ka yanglutsü atema Australia nunger compang ka nem conditional loan USD million 400 agütsütsü telemtetba agiba sangdongogo. Scandium ya critical rare earth element ka aser iba shishilemba ya China-i azüoker lir.

US tir Donald Trump aser mining executive tem tsüngda Washington nung senden ka amenba sülen Pentagon-i iba osang ya sangdonga liasü.

Australia nunger mining firm Sunrise Energy Metals-i tanga sangdong ka ajanga ashiba agi, Fifield, New South Wales nung mine ka yanglutsü atema benoka aliba ya Western scandium supply atema tamendakdak ka kümdaktsütsü nükjidong lir.

Company indang website ajanga ashiba agi, "Syerston Scandium Project" yagi tongtibang technology tem atema tongtibang metal ka

agütsütsü, kong aerospace aser 5G/6G telecommunications technology densema lir.

Scandium ya defence, tayimtsü aser data centre tem atema tongtibang lir aser iba ya tanga mining indang byproduct ka lir. Iba ya aluminium takangba aser flexible kümdaktsütsü aser tatsük oa jetzüka aoba tizükdaktsütsü atema ajak dang tajungtiba element lir.

Alima nung New South Wales nung scandium timba lir. China shirnoki scandium supply aser processing azüoka lir, parnoki taoba küm iba mineral ya defence osettem atema export masütsü atema tenokdangba agütsü aser iba ajanga US tanga supplier bushi tenzü.

Trump aser Australia Ato Kilonser Anthony Albanese nati China den tokteptsü atema October ita critical minerals agreement ka nung sign sütepogo, aser linük anapronglai iba mapa atema USD billion kaka entoktsü nangzüktepa liasü.

Germany nung military base ka kolak nung drone yimzüba nguogo

Berlin, Luroi/August 8 (Agencies): Leipzig/Halle Airport nung bomb bena aliba drone ka ngutetba sülen anogo ana lir Brehostibarnü Germany anüolen military base ka kolak nung drone ana yimzüa aliba nguogo, ta ketdangsürtemi Honibarnü ashi.

Germany armed forces otongdar kati ashiba agi, drone tem ya Brehostibar aonung 10 ako shi nung North Rhine-Westphalia kübok Mechernich nung amendaka aliba army base ka kolak nung yimzüya aliba ngutetogo.

Drone yimzüa aliba jangjaba sülen Military police yok aser ken o ya Euskirchen nung police nem bendanga

agütsüogo. Otongdar yagisa, ken o police temi bushisüngdang dar ta ashi, saka osang tejangja magütsü.

German media-i ashiba agi, Mechernich nung Bundeswehr base ya high-security underground storage facility ka lir, kong military hardware spare parts tem rizünga ayur aser iba ya U.S. Patriot air defence systems anepaluba sepaitem indang base lir.

Mongolbarnü Leipzig/Halle Airport nung ngutetba drone ya Ukraine indang Antonov An-124 cargo tayimtsü anasa nguteta liasü, ta German media sangdong balala ajanga metetdaksü.

Iba ajanga drone tem NATO airspace-i aitba aser

Germany amala iba military alliance nung linüktem security dak sendakba nung amokmeren tasen atema renema ali mali aji ashishi tenzükogo.

Germany nunger ketdangsürtemi iba tatalokba dak sendakba nung yimjak nung bendanger linük shinga dak tai metongloktsü, saka ozüing yanglurtem kari Russia dak tai tongloktsüogo, shirnok 2022 küm nungi Ukraine den rara arudar.

Berlin nung Russian embassy-i Hokolbarnü Leipzig nung tatalokba dak sendakba nung parnok kecha shilem mali ta shiogo. Embassy-isa, kuli kecha makai Russia dak tai tongloktsüba tatishitsü rongnung iba ya-a ka lir, ta ashi.

Don Bosco School-i 2buba Inter High School & Hr. Sec. School Basketball Tournament kokogo



2nd Inter High School & Higher Secondary School Basketball nung tetsür champion aser tebur champion Don Bosco Higher Secondary School pur külemi tangokba noksa nungji angur.

Mokokchung, Luroi/August 08(TYO): Basketball Association Mokokchung District-i (BAMD) ayongzüka 2nd Inter High School & Higher Secondary School Basketball Tournament, BAMD Basketball Court Mokokchung nung August 05 nungi tenzüka August 07 nü tashi kanga dang takokma nung asayaogo. Iba asayamung nung High School 2 aser Higher Secondary School 6-i shilem agiogo.

Taküm iba tournament nung Mokokchung district nungi dang masü saka

Dimapur nungi Don Bosco Higher Secondary School aser Holy Cross Higher Secondary School atuagi shilem agiogo.

Tetsür aser tebur naprongla pool anana lemsar asaya aser iba nungjagi tetsürtem Final Queen Mary Higher Secondary School.Mkg aser Don Bosco Higher Secondary School

School Dimapur tsüngda asayaba nung Don Bosco School Higher Secondary School Dimapur-i 29-19 agi Queen Mary Higher Secondary School.Mkg kokteta takok marok aben aser ano teburtem asaya nunga Don Bosco School Higher Secondary School Dimapur-i 57-42 agi Eden Academy Mkg. kokteta tarok marokbena liasü.

Iba tournament nung jurila senpet balala yamai ngua liasü.

Tetsürtem:

Most Promising Player- Sanenienla (Mayangnokcha HSS)
Player of the tournament- Mehrin Beck (Don Bosco HSS)

Teburtem:

Most Promising Player-Adikhum(Don Bosco HSS)
Player of the tournament-Imkongakum (Eden Academy)

Chaliha tang mezüngbuba BWF World Tour final tongtetogo

Luroi/August 8, 2026 (Agencies): India tsür Ashmita Chaliha-i Honibarnü Korea Masters Super 300 semifinal nung külem India tsür Rakshitha Ramraj 21-13, 16-21, 21-13 agi akokba sülen tang mezüngbuba BWF World Tour kija asaya final ka tongtetogo.

Arishi küm 26 tain asayar shiba temekok tachichilen yiruba ajanga ita asem masayai lir May ita nungi asaya tenzüka liasü, lai asaya tenzüksiba sülen kanga junga asaya arudar. La Macau Open nunga semifinal tonga asayaba sülen tang Korea nung final tongtetogo. World No. 50 Ashmita, shiba Park Tae-sang kübok National center of excellence, Guwahati nung trainign agir, lai final nung China tsür Han Qianxi den asayatsü.

World No. 35 Qianxi-i semifinal tanga ka nung asaya 22-20, 18-21, 21-14 akokba sülen final tongtetogo.

Tanvi Sharma-i Taipei Open akokba sülen Ashmita-



ia iba asayamung final tongtetogo, koba BWF World Tour anabuba atonga India nunger asayatem final tongtetba asütsü.

Taküm India nunger asayatem aikati asayamung balala nung final tongtetogo. Ayush Shetty Asia Championships nung final tonga asaya, Lakshya Sen All England final, Devika Sihag Thailand Masters final, Kidambi Srikanth US Open final, Tanvi Taipei Open final, PV Sindhu Japan Open final, Satwiksairaj Rankireddy aser Chirag

Shetty na Singapore Open final aser tang Ashmita Korea Masters final tongtetogo.

Ashmita shibai quarterfinals nung top seed Japan tsür world No. 22 Hina Akechi koka liasü, lai Rakshitha den asaya kanga junga tenzüker aser la yakta dang tejakdang aküm aser mezüngbuba game ya 21- 13 agi ayong ayonga koka liasü.

Ajisüaka tanabuba game nungbo arishi küm 19 tain Rakshitha 4-1 agi tejakdang ser tenzüker aser la maneni 8-3 agi tejakdang liasü.

Ajisüaka Ashmita-ia kanga junga asaya tenzüka point 12-13 aküm. Iba sülen Rakshitha sa maneni 17-13 agi tejakdang aküm aser tanabuba game ya koka decider asayatsüsa aküm.

Tasembuba game yabo Ashmita-i kanga agi tajungba asaya tenzüker aser break tashi nung la 11-3 agi tejakdang liasü. Asaya nung Ashmita-i Rakshitha nem la menepdaksütsü asoshi kecha maongka magütsüi maneni ka tejakdang ser asaya aser tasembuba game ya 21-14 agi koka liasü.

DDCA-i Watinuksung Jamir nem tenüngsang agütsü

Dimapur, Luroi/August 8 (TYO): Nagaland Cricket Association Hon. President, Watinuksung Jamir, taruba Sri Lanka den Test asayamung atema Indian Cricket Team indang Team Manager asütsü asoshi shimba atema Dimapur District Cricket Association (DDCA)-i pa nem tenüngsang agütsüogo.



DDCA asoshi Nagaland nungi mezüngbuba administrator ka international jenjang nung linük tenüng nungi tongtibang shilem agütsü atema shimba ya kanga dang nemdangtsü mapang ka lir, ta kasa sangdong ajanga metetdaksü.

Pai, Nagaland kübok tesem balala nung cricket asaya ajungkettsü atema anibelem mesasai bendanga agüja inyaka aruogo, aser pa mapa tajung reprangteta tushitsü aser khuret tuluba nongloktsütsü langa lir.

Onok rongnungi ka Indian cricket tenüng nung international jenjang nung tenzüksü

asoshi maongka anguba ajanga Dimapur nung saisabong lokti tentet ajak ajungmesor. Iba ajanga mekoktetsü kecha mali ta lanur asayatem dang sayur, ta kasa sangdong ajangasa metetdaksü.

Iba asayamung nung Watinuksung Jamir-i takok ngua shilem agir arütsü atema DDCA-i imlaja atar. Pai, pa mapa kanga junga inyaktetsü aser iba asaya aser Nagaland asoshi maneni takok aser konang nüngsa bener arütsütsü ta onoki tamang akar, ta DDCA tir-i kasa sangdong ajanga ashi.

World U20 C'ships: Ashish Yadav-i silver medal angu

Luroi/August 8, 2026 (Agencies): 2026 World Athletics U20 Championships nung Ashish Yadav-i India asoshi mezüngbuba medal nguogo. Pai tebur javelin throw asaya nung silver medal ngua liasü.

Eugene (USA) nung asaya aliba asayamung nung Yadav-i nület meter 74.09 tsüteta silver medal nguogo.

Kasa asaya nung India nunger asayar T Dharanidharan (72.35m) trokbuba nung tembanga liasü.

Iba asaya nung silver medal anguba sülen Yadav ya Olympic medallist Neeraj Chopra sülen iba asayamung asayar kümogo. Chopra-i 2016 küm Poland nung asayaba mapang nület meter 86.48 tsüteta world junior record ka yanglu koba tang tashi shingaia majateti lir.

Tebur javelin throw asaya ya South Africa nunger Jan-Hendrik Heymans-i akok. Pai nület meter 80.50 tsüteta

liasü. Dominica nunger asayar Addison James-i (73.89m) bronze medal nguogo.

Kasa mapang nung national senior record bena alila Pooja Singh, tetsür high jump asaya final-i iogo.

Tebur 400m asemtepba final nung Mohommed Ashfaq-i alizüing 46.20 seconds nung tongteta tibuba nung tembang. Pai anogo ka tejakdang first-round heats nung alizüing 45.81 seconds nung tongteta U20 national record ka yanglua liasü.

America nunger Jayden Deleon-i 400m asemtepba nung gold medal ngua championships record (44.47 seconds) tasen ka yangluogo. Iba asaya nung America nungersa Quincy Wilson-i (44.62) silver aser South Africa nunger asayar Leendert Koekemoer-i bronze (44.96 seconds) medal ngua liasü.

Maneni tebur long jump asaya nung Shahnaz Khan aser Jithin Arjuna nata qualify süa final round-i iogo.

BILEMDANGANG

"Amungnü meshiteta yuang."